

三國志注補

三國志注補卷三十四

仁和趙一清撰

蜀志二主妃子列傳第四

而孫夫人還吳

元和郡縣志孫夫人城在孱陵城東五里與昭烈相敘別築此城居之

注先主入益州吳遣迎孫夫人夫人欲將太子歸吳諸葛亮使趙雲勒兵斷江畱太子乃得止

何云此妄言先主益州時諸葛公與張趙等泝流至蜀孫夫人還吳當在建安二十年爭荊州時

注焉夫猶不可以無禮

馬一本作匹

章武元年六月使司徒靖立永爲魯王

鼎錄章武三年先主作二鼎一與魯王文曰富貴昌宜侯王

一與梁王文曰大吉祥宜公王並古隸書高二尺

璿爲亂兵所殺

何云宋本殺作害

宿松羅忠濟初校

番禺陶邵學覆校

陽湖吳翊寅再覆校

三國志注補卷三十四

三國志注補卷三十五

蜀志諸葛亮列傳第五

瑁瑯陽都人也

續郡國志瑁瑯國陽都故屬城陽

父珪字君貢

何云一作子貢

注太守劉繇求兵擊玄玄退屯西城

方輿紀要卷八十四豫章城有西城在子城西子城一名牙

城

亮躬畊隴畝好爲梁父吟

水經沔水注沔水東逕樂山北昔諸葛亮好爲梁父吟每所
登遊故俗以樂山爲名一清案梁父吟曰步出齊城門遙望
蕩陰里里中有三墳累累正相似問是誰家墓田疆古冶子
力能排南山文能絕地紀一朝被讒言二桃殺三士誰能爲
此謀國相齊晏子何云蔡中郎琴頌云梁父悲吟周公越裳
武鄉之志其有取於此乎今所傳之詞蓋非其作又寰宇記
卷一百四十五諸葛宅有井深四丈廣尺五寸迄今壘砌如
初

注案崔氏譜州平太尉烈子均之弟也

御覽卷四百八十一引梁祚魏國統曰崔州平者漢太尉烈
之孫也兄曰元平爲議郎以忠直稱董卓之亂烈爲卓所害

元平常思有報復之心會病卒

注魏略曰亮在荊州以建安初與潁川石廣元徐元直汝南孟公威等俱游學

水經沔水注檀谿之陽有徐元直崔州平故宅悉人居故習鑿齒與謝安書曰每省家舅縱自檀谿念崔徐之交未嘗不撫膺躊躇惆悵終日矣一清寡孟公威附見溫恢傳

注三人問其所至

何云宋本至作志

先主遂詣亮凡三往乃見

文選出師表注引荊州圖曰鄧城舊縣西南一里隔沔有諸葛亮宅是劉備三顧處

今操已擁百萬之眾挾天子以令諸侯

何云宋本以字作而

將軍身率益州之眾以出秦川

何云以出宋本作出拊

注乃投眊而言曰

何云言字宋本作答

更疎巾單衣

巾乃布之譌

注庶後數年病卒有碑在彭城今猶存焉

水經獲水注彭城郡城內有魏中郎將徐庶碑植於街右曾
爲楚相也

時權擁軍在柴桑

方輿紀要卷八十五柴桑城在九江府南九十里漢縣屬豫章郡吳屬武昌郡

卽遣周瑜程普魯肅等水軍三萬隨亮詣先主并力拒曹公
方輿紀要卷七十八萬乘湖在荊州石首縣東四十里相傳
武侯屯兵處

注零陵先賢傳云亮時住臨蒸

蒸當作烝方輿紀要卷八十衡州府衡陽縣漢承陽郡二縣
地後漢改承陽曰烝陽三國吳析二縣地置臨烝縣又來陽
縣有侯計山相傳武侯憩此計兵一名侯憩山安仁縣西有
相公山寨相傳武侯屯兵處又紀要卷八十一永州府東安

縣南有諸葛嶺先主遣武侯督長沙三郡賦曾屯駐於此沔州黔陽縣西有鐘成廢縣縣有諸葛古城二一在城南四十里其地有臥龍嶺一在城東五十里之安江堡俗亦謂之諸葛營相傳武侯撫綏谿洞諸蠻嘗駐於此

亮與張飛趙雲等率眾泝江分定郡縣

寰宇記卷八十二梓州銅山縣會軍堂山高三里先主入蜀諸葛亮張飛等分定州界略地至此百姓以牛酒犒師亮因會軍士於此後傳爲會軍堂山

先主外出亮嘗鎮守成都足食足兵

寰宇記卷七十二讀書臺在成都縣北一里諸葛亮相蜀築此臺以集諸儒兼以待四方賢士

注世或有謂備欲以固委付之人

何云人字宋本作誠

建興元年封亮武鄉侯

方輿紀要卷五十六武鄉谷在漢中府南鄭縣蜀漢封丞相亮爲武鄉侯蓋邑於此又襄城縣西十七里有武鄉城後魏延昌初置武鄉縣屬襄中郡

注況以數十萬之眾據道而臨有罪

何云道上元板有正字

亮率眾南征

方輿紀要卷七十郿廢縣在敘州府西南漢縣屬健爲郡後漢省諸葛武侯南征置郿郿成晉曰存駝縣改屬建寧郡

注亮在南中所在戰捷聞孟獲者爲夷漢並所服

何氏校在字改至並字衍

注亮笑縱使更戰七縱七禽而亮猶遣獲獲止不去曰公天威也南人不復反矣遂至滇池南中平皆卽其渠率而用之

水經注卷三十七葉榆水又東逕漏江縣泱流山下復出蝮口謂之漏江諸葛亮之平南中也戰於是水之南又東與盤江合盤水出律高縣東南盍町山北入葉榆水諸葛亮入南中戰於盤東是也寰宇記卷七十四嘉州犍爲縣有石人蜀記云昔諸葛亮南征蠻中十里刻一石人今黎雋之路尙有存者又卷七十七周公山在雅州嚴道縣東南山勢屹然上有龍穴常多陰雲耆老傳云昔諸葛亮征南於此夢見周公

遂爲立廟方輿紀要卷七十二蔡山在雅州東五里禹貢蔡蒙旅平卽此蔡山也武侯祀周公於蔡山今亦名周公山又卷一百十三潞江在永昌府潞江安撫司東北五十里本名怒江以波濤洶湧而名也滇記諸葛武侯六擒孟獲駐兵怒江之潞卽此又卷一百十七鄧川州東二十里豪豬洞山頂有石牆遺址下有龍潭滇志孔明縱孟獲於白厓獲引所部至銀坑坑一名豪豬洞險絕非人力可到孔明出奇策擒之洞南有諸葛寨又卷一百十八諸葛營在永昌府城南七里一名諸葛村舊記孔明旣擒孟獲移師永昌卽金齒也城南八里西山下武侯嘗屯兵其間師還民構祠祀之又永平縣東北五里有關索寨周迴二里俗傳蜀漢將關索所築寨下

有洞首尾相通樵牧過之常聞洞中有戈戟聲一清案西南夷謂爺爲索關索寨卽關爺寨皆尊稱也辰州府城南二酉山下有伍索灘以伍胥得名亦其類爾非別有關索其人壯繆子興爲武侯所器異官侍中中監軍或從南征寨以此名歟又古今刀劒錄曰諸葛亮定黔中從青石祠過遂抽刀刺山頭刀不拔而去行人莫測

注漢書地理志曰瀘惟水出牂柯郡句町縣

寰宇記卷八十嶠州會川縣瀘水案十道記云水出蕃中入黔府歷郡界出拓川至此有瀘沽關關上有石岸二千丈四時多瘴氣三四月間發人衝之死非此時中則人多悶吐唯五月上伏卽無害故諸葛武侯征越嶠疏云五月渡瀘深入

不毛方輿紀要卷七十四瀘水由會川衛南流入金沙江多瘴氣四五月間尤甚水流峻急多巉石土人以牛皮爲船方涉津渚

至於斟酌損益進盡忠言則攸之禕允之任也願陛下託臣以討賊興復之效不效則治臣之罪以告先帝之靈責攸之禕允等之慢以彰其咎

靈字下何氏以董允傳參補若無興德之言則七字一清案李善文選注則蜀志本有此七字文選闕誤不謂今蜀志反脫失也抑李注所稱蜀志指允傳歟又上文斟酌損益允傳作規益然與下句意同似乎辭費作損益爲是

亮身率諸軍攻祁山戎陣整齊賞罰肅而號令明

姜云戎陣整齊號令嚴肅此名將之事奈何謂亮短於將略
命張郃拒亮使馬謖督諸軍在前與郃戰于街亭

方輿紀要卷五十九戎丘城在秦州西城西武侯使馬謖與
張郃戰于街亭親引大軍屯於戎丘卽此街泉城在秦安縣
東北漢置縣屬天水郡後漢省入略陽縣

亮拔西縣千餘家還于漢中

寰宇記卷一百三十三梁州西縣有諸葛城卽孔明拔隴西
千餘家還漢中築此城以處之因取名焉

注使孫策坐大遂并江東

何云遂并江東下有脫文當是指斥孫權之語吳臣諱而削
之

注危於祁連

祁連謂鄴下濫口之戰

注幾敗伯山

伯一本作卅是也北山謂張燕

注任用李服而李服圖之

李服疑卽王服

注突將無前賓叟青羌

何云後漢書董卓傳注云叟兵卽蜀兵也漢代呼蜀爲叟又
劉焉傳注引孔安國尙書傳云蜀叟也然光武紀注引華陽
國志云武帝元封二年叟夷反將軍郭昌討平之因開爲益
州郡則叟者蜀之西南夷尙書疏亦云叟蜀夷之別名卽今

之雲南也又李恢傳賦出叟濮耕牛戰馬此叟之在滇顯證也青羌則青衣羌耳

注欲以一州之地

一本地作虛

注於是有散關之役

何云趙雲以建興七年卒散關之役乃在六年後人或據此疑表爲僞非也以元遜傳觀之自明第此表乃劇論時勢之盡非若發漢中時所陳得以激勵士眾不妨宣洩於外失之蜀而傳之吳或伯松寫雷箱篋元遜鈞致之於身後耳集不載者益明武侯之慎非由陳氏之疏若趙雲傳七年字當爲六年雲本信臣宿將箕谷失利適由兵弱旣此雜號將軍以

明法散關之役使其尚在必別統萬眾使復所負而不聞再出其必歿於是冬之前矣

亮自出至建威

方輿紀要卷五十九建威城在陝西階州東北三百六十里後漢末所置戍守處也

注使此賊得計

姜云此賊指曹氏觀武侯前對先主後啟劉禪之言真有刻不與賊俱生之意忠臣之志可以貫穹壤泣鬼神矣

注若大軍致討彼上當分裂其地以爲後規

何云上字宋本作高漢用吳以協規滅賊則光復舊物其勢可以臣妾萬方彼雖據其地入朝不久矣曰高者僅許其一

時之能也作上字則與以爲後規意不相屬雖一字疏密懸絕

亮復出祁山

水經漾水注祁山上有城極爲巖固城南三里有亮故壘壘之左右猶豐茂宿草蓋亮所植也

注郤欲分兵駐雍郿

水經渭水注引魏氏春秋曰諸葛亮寇郿司馬懿據郿拒亮卽此縣也

注因大茭刈其麥與宣王逼於上邽之東

晉書宣帝紀帝進軍淪虞亮聞大軍且至乃自帥眾將芟上邽之麥諸將皆懼帝曰亮慮多決少必安營自固然後芟麥

吾得二日兼行足矣於是卷甲晨夜赴之亮望塵而遁帝曰
吾倍道疲勞此曉兵者之所貪也亮不敢據渭水此易與耳
進次漢陽與亮相遇帝列陣以待之使將牛金輕騎餌之兵
才接而亮退追至祁山亮屯鹵城據南北二山斷水爲重圍
帝攻拔其圍亮宵遁追擊破之俘斬萬計時軍師杜襲督軍
薛悌皆言明年麥熟亮必爲寇隴右無穀宜及冬預運帝曰
亮再出祁山一攻陳倉挫衄而反縱其後出不復攻城當求
野戰必在隴東不在西也亮每以糧少爲恨歸必積穀以吾
料之非三稔不能動矣於是表徙冀州農夫佃上邽興京兆
天水南安監治一清案史臣於懿因多誇大之辭兩軍相拒
其情勢略亦可尋焉上邽城屬隴西郡三國魏爲秦州治

注宣王尊亮至于鹵城

漢書地理志隴西有西縣安定有鹵縣郡國志安定無鹵縣蓋廢省矣西縣城在秦州西南百二十里鹵城蓋西城之譌此與楊阜傳之鹵城有別馬超時在冀彼文故宜是鹵城武侯出上邦則當是西城也

注賈栩魏平數請戰

晉書宣帝紀亮圍將軍賈嗣魏平於祁山此云賈栩未知孰是

注乃使張郃攻無當監何干於南圍

干當作平字

注亮時在祁山旌旗利器守在險要十二更下在者八萬

周官小司徒均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人宋王與之周禮訂義引呂伯恭云司馬法曰六尺爲步步百爲畝畝百爲夫夫三爲屋屋三爲井井十爲通通爲匹馬三十家士一人徒二人以小司徒參之司徒之可任者如此其多司馬法之出土徒數如彼其少古人用兵皆爲不勝計以慮敗也故不盡用之雖敗尙可扶持故小司徒只言其可任者非實數也自此以後調發者皆用實數幸而一勝不幸而一敗則皆不可救矣晉作州兵乃是盡數調發甚非先王之制他如魯城作丘甲蘇秦以齊王臨淄之中七萬戶不下戶三男子而卒以二十一萬營操謂崔

珍曰昨案戶籍可得三十萬眾故爲大州是皆以實數調發
惟諸葛孔明僅有此意一蜀之大其兵多不過十二萬孔明
所用八萬常留四萬以爲更代蜀之所以彊者以孔明不盡
用之及蜀之亡尙有十萬二千數年之間所折者不過二萬
耳何云蜀戶二十八萬男女口九十四萬於二十八萬戶中
二家零三分之餘出一人於五十六萬四千男女口中四丁
零四分發一人其不忍盡民之力如此又蜀吏四萬人除四
戶復除則是二家出一也除其中老弱則是每丁發一人也
注亮旣出戰場

何云出字宋本作在

亮悉大眾由斜谷出以流馬運據武功五丈原與司馬宣王對

於渭南

晉書宣帝紀青龍二年亮又率眾十餘萬出斜谷壘於郿之渭水南原天子憂之遣征蜀護軍秦朗督步騎二萬受帝節度諸將欲住渭北以待之帝曰百姓積聚皆在渭南此必爭之地也遂引軍而濟背水爲壘因謂諸將曰亮若勇者當出武功依山而東若西上五丈原則諸軍無事矣亮果上原將北渡渭帝遣將軍周當屯陽遂以餌之數日亮不動帝曰亮欲爭原而不向陽遂此意可知也遣將軍胡遵雍州刺史郭淮其備陽遂與亮會於積石臨原而戰亮不得進還於五丈原世說曰諸葛武侯與司馬宣王治軍渭濱克日交戰宣王戎服蒞事使人視武侯獨乘素輿葛巾毛扇指麾三軍隨其

進止宣王歎曰諸葛君可謂名士矣又史通敘事篇云王隱稱諸葛亮挑戰真獲曹各之利其事相符言之謔矣一清案武侯數挑戰懿不出因遣以巾幘婦女之飾以激怒之知幾所指卽此事也

爲久住之基

住字何氏校改駐

注罰二十以上皆親擊焉

此條與魏志明帝紀複出何云罰二十以上豈無參佐可以平之孔明雖蹇蹇夙夜不若是之不諳政體也

亮遺命葬漢中定軍山因山爲墳冢足容棺斂以時服不須器物

水經沔水注亮葬定軍山因卽地勢不起墳壟唯深松茂柏攢蔚川阜莫知墓塋所在何云葬漢中者欲後人嗣事於魏也

亮性長於巧思損益連弩木牛流馬皆出其意推演兵法作八陣圖咸得其要云

水經沔水注定軍山東名高平是亮宿營處營東卽八陣圖也遺基略在崩褫難識又江水注江水東逕諸葛亮圖壘南石磧平曠望兼川陸有亮所造八陣圖東跨故壘皆纍細石爲之自壘西去聚石八行行間相去二丈因曰八陣旣成自今行師庶不覆敗皆圖兵勢行藏之權自後深識者所不能了今夏水漂蕩歲月消損高處可二三尺下處磨滅殆盡方

輿紀要卷十九薛氏曰圖之可見者三一在沔陽之高平
舊壘一在新都之八陣鄉一在魚復永安宮南江灘水上蔡
氏謂廣都亦有之則八陣凡四然廣都土壘已殘破不可攷
世傳風后握機文則魚復圖之注馬隆八陣贊又握機文之
注又漢時都肄已有孫吳六十四陣竇憲常勒八陣擊匈奴
晉馬隆用八陣以復涼州陳勰持白虎幡以武侯遺法教五
營士後魏柔然犯塞刁雍上表採諸葛八陣之法爲平地禦
寇之方李靖對太宗言六花陣法本於八陣是則武侯之前
旣有八陣後亦未嘗亡也嚴氏曰武侯所習風后五圖桓溫
云是常山蛇勢徒妄言耳常山蛇者孫子所謂率然蓋高直
陣也杜牧曰數起於五而終於八武侯以石縱橫八行布爲

方陣奇正之法皆生於此又八陣圖後有二十四聚作兩層
每層十二聚洪氏曰八陣魁六十有四重易之卦也卻月魁
二十有四作易之畫也畫起於圓而神故卻月之形圓卦定
於方以知故八卦之體方方居前而圓居後卦自畫始方自
圓生也辟門直袤曲折翼其旁陰陽二物也握奇則虛一之
象也又宋書王玄謨傳賜以諸葛亮箭袖鎧服孝祖傳御仗
先有諸葛亮箭袖鎧帽二十五后弩射之不能入上悉以賜
孝祖北齊書陸法和傳軍次白帝謂人曰諸葛孔明可謂名
將吾自見之此城傍有其埋弩箭鏃一斛許因插表令掘之
如其言

注况亮德範遐邇勳蓋季世興王室之不壞

水經沔水注無興字疑此羨文

奏使臣定故蜀丞相諸葛亮故事

因學紀聞云昭烈謂武侯之才十倍曹丕以丕之盛終身不敢議蜀也司馬懿畏蜀如虎非武侯之敵史通云陸機晉史虛張拒葛之鋒又云蜀老猶存知葛亮之多枉然則武侯事蹟湮沒多矣古今刀劍錄曰蜀主劉備以章武元年歲次辛丑採金牛山鐵鑄八劍各長三尺六寸一備自服一與太子禪一與梁王理一與魯王永一與諸葛亮一與關羽一與張飛一與趙雲並是亮書皆作風角處所有合稱元造乃五萬口皆連環及刃口列七十二鍊柄中通之兼有二字亮所與言盡眾人凡士故其文指不得及遠也

李密對張華辭旨大略相同

年二十五建興元年卒

何云公北駐漢中在建興五年元字誤思遠之生卽在建興五年也詳元字當作六伯松亦以轉運之勤死於王事

其明年爲翰林中郎將

何云翰林名官始此耶然其職爲中郎將則猶之羽林也後因親信宿衛遂使才藻藝能之士皆待詔焉及後待掌王言乃取翰林主人子墨客卿之辭爲美名恐反失其本也又云宋本正作羽林一清案周羣爲儒林校尉則翰林中郎將未足致疑不必以宋本作羽林字爲證也

自陰平由景谷道劬人

方輿紀要卷六十八景谷廢縣在保寧府昭化縣西百里漢
廣漢郡之白水縣地隋開皇十八年改曰景谷蓋以故地爲
名鄧艾傳所謂陰平之邪徑也

瞻督諸軍至涪停住前鋒破退還住綿竹艾遣書誘瞻曰若降
者必表爲琅琊王瞻怒斬艾使遂戰大敗臨陣死時年三十七
眾皆離散艾長驅至成都瞻長子尙與瞻俱沒

元和郡縣志初瞻在涪而艾已入江油瞻曰吾內不除黃皓
外不制姜維進不守江油吾有三罪何面而反追就綿竹埋
人腳而戰父子死焉寰宇記卷七十三綿竹縣故城在漢州
德陽縣北三十五里李膺益州記云石子頭二十里卽故綿
竹縣城諸葛瞻埋人腳戰處也

注膽雖智不足以扶危勇不足以拒敵而能外不負國內不改父之志忠孝存焉

困學紀聞云海翁欲傳末略載瞻及子尙死節事以見善善及子孫之義南軒不以爲然以爲瞻任兼將相而不能極諫以去黃皓諫而不聽又不能奉身而退以冀主之一悟可謂不克肖矣兵敗身死雖能不降僅勝於賣國者耳以其猶能如此故書子瞻嗣爵以微見善善之長以其智不足稱故不詳其事不足法也何云思遠於景曜四年以尙書僕射軍師將軍行都護衛將軍與董厥共平尙書事至六年冬亡國其任事未久董厥閻宇位皆在其上所謂任兼將相者恐未悉當時事勢也姜維略言之而後主不納逃讒沓中思遠少爲

主塔亦蜀之宮子奇也能必八乎一清案朱子之論最爲平
允南軒則近於苛矣

注京字行宗

何云行字元板作仲

注京位至廣州刺史

何云廣字宋本作江

延熙二十四年

何云孫權歿於延熙十五年二字衍文且延熙止二十年亦
無二十四年也

注未知國中強弱

何云宋本作中國

注朝會不華

華一本作譁是也

注亮持本者也其於應變則非所長也

姜云以亮奇才而陳袁之徒皆有不能應變之論信乎人不可以無年

注天下崩壞

何云御覽作天下分崩

注若無策以裁之則非明哲之謂海內歸向之意也

何云向宋本作商

注鎮南將軍劉弘至隆中觀亮故宅立碣表閭

水經沔水注車騎沛國劉季和之鎮襄陽也與犍爲人李安

其觀此宅命安作宅銘後六十餘年永平之五年習鑿齒又
爲其宅銘焉

宿松羅忠濟初校

番禺陶邵學覆校

陽湖吳翊寅再覆校

三國志注補卷三十五

三國志注補卷三十六

仁和趙一清撰

蜀志列傳第六

河東解人也

方輿紀要卷四十一解城在蒲州晉臨縣南南十八里春秋時晉之解梁

注此與魏氏春秋所說異也

何云異上宋本有無字

紹遠大將軍顏良

軍字何氏校衍

曹公卽表封羽爲漢壽亭侯

方輿紀要卷八十漢壽城在常德府東四十里本漢之索縣
武陵郡治焉後漢陽嘉三年更名漢壽荆州治此三國吳改
曰吳壽晉復舊一清案蜀以葭萌爲漢壽縣而關公佐命元
勳更不易封以錫命漢朝故特改斯縣以寵異之陳壽亦略
其書

羽又斬將軍龐惠梁郊陸渾羣盜

羣盜爲侯音孫狼也見武紀胡昭傳

又南郡太守糜芳在江陵將軍傅士仁屯公安

何云揚戲輔臣贊及吳主傳皆作士仁呂蒙傳亦然傳字行
於是權陰誘芳仁芳仁使人迎權

方輿紀要卷七十八擲甲山在荆州府城西龍山門西北隅

相傳關壯繆還救南郡聞糜芳已降憤而擲甲於此

注權遣將逆擊羽斬羽及于平於臨沮

水經江水注江陵舊城關羽所築羽北圍曹仁呂蒙襲而據之羽曰此城吾所築不可攻也乃引而退一清案方輿紀要卷七十九臨沮城在襄陽府南漳縣西南六十里孫權傳云獲於漳鄉潘璋傳云到臨沮住夾石水經漳水注亦以爲臨沮之漳鄉今當陽縣北有章鄉又古今刀劔錄曰關羽爲先主所重不惜身命自採都山鐵爲二刀名曰萬人敵及羽敗惜刀投之水中

張飛字益德

水經沮水注當陽縣城在綠林長坂南卽張翼德橫矛處也

三國志卷三十六
是翼字又李商隱詩或詭張飛胡爲多髯也義山使事必有
所本

注曹公拜飛爲中郎將

何云拜下御覽有羽字

注飛據水斷橋瞋目橫矛曰身是張益德也可來共決死敵皆
無敢近者

方輿紀要卷七十七當陽縣北六十里有倒流橋沮漳二水
合流其下卽張飛據水斷橋處

注以飛爲宜都太守征虜將軍封新亭侯後轉在郡南

方輿紀要卷七十八張屯湖在荊州石首縣西四十里相傳
張飛嘗屯於此古今刀劔錄曰張飛初拜新亭侯自命匠鍊

赤朱山鐵爲一刀銘曰新亭侯蜀大將也後被范疆所殺疆將此刀入吳

注初先主人蜀至巴郡顏拊心歎曰此所謂獨坐窮山放虎自衛也

水經江水注巴郡治江州初平元年分巴爲二郡於江州則永寧郡治也至建安六年劉璋納蹇允之言復爲巴郡以嚴顏爲守此卽拊心處

注巴郡領巴西太守

譙周巴記初平四年劉焉部從事趙韙分巴爲二肆欲得巴舊名故郡以墊江爲治而割安漢以下爲永寧郡建安六年以蹇允公分巴爲三以永寧爲巴東墊江爲巴郡閬中爲巴

西於是有三巴之稱

注飛率精卒萬餘人從他道邀郤軍交戰山道迮狹前後不得相救飛遂破郤

後漢書郡國志巴郡宕渠方輿紀要卷六十八先主嘗分巴郡之宕渠宣漢漢昌三縣置宕渠晉省入巴西廣安州渠縣卽宕渠縣地縣東北七里有八濛山八峰起伏其下平曠十餘里江水環之不匝者一里常有烟霧濛其上山下有勒石云漢將張飛大破賊首張郃於八濛飛所自題也

注郤棄馬緣山獨與麾下十餘人從間道退引軍還南郤巴士獲安先主爲漢中王拜飛爲右將軍假節

魏志武帝紀建安二十二年劉備遣張飛馬超吳蘭屯下辨

遣曹洪拒之明年曹洪破吳蘭斬其將任夔等五月張飛馬超走漢中陰平氏彊端斬吳蘭傳其首先主傳先主率諸將進兵漢中分遣吳蘭雷銅等入武都皆爲曹公軍所沒事亦見楊阜傳而此傳及馬超曹洪傳俱略之方輿紀要卷五十九鞏昌府成縣漢武都郡下辨道地後漢爲武都郡治縣東南有固山先主取漢中使張飛屯下辨軍於固山卽此矣

注進封西鄉侯

前漢書地理志涿郡西鄉侯國在今涿州西北二十里張侯故以本土寵之也

注其帳下將張達范疆殺飛持其首順流而奔孫權

寰宇記卷八十六閬州閬中縣有張飛冢在刺史廳東二十

步高一丈九尺

注桓帝時其父字子碩

後漢書董卓傳注引獻帝紀年騰父名平

注嘗從鄆山中斫材木

後漢書郡國志隴西郡鄆縣鄆山鄆縣之山也禹貢西頃山在其境

注署爲軍行事

何云行字元板作從

注超負其多力陰欲突前捉曹公

御覽卷七百四引江表傳云魏太祖與馬超單馬會語超負其多力嘗製六斛米囊東西走馬輒捉米囊以量太祖輕重

太祖尋知之曰幾爲狡虜所欺

注阜敘起於鹵城

前漢書地理志安定郡鹵縣後漢廢

注初超未反時其小婦弟种噩三輔

後注引典曰超庶妻董則种疑姓董也

以超爲平西將軍督臨沮因爲前都亭侯

超本封都亭侯入蜀後不更封故云爲都亭侯此與關壯繆之漢壽亭侯但改奉邑而不別封可以互證前爲二字譌倒注岱位至平北將軍進爵陳倉侯

晉書宣帝紀青龍三年蜀將馬岱入寇帝遣將軍牛金擊走之一清案此是漢延興十三年丞相亮薨之次年也

黃忠字漢升

何云升御覽作叔

與表從子磐其守長沙攸縣

長沙府志黃忠故宅今爲長沙衛署其盛甲器械貯北門城樓上明時巡案查驗登報後燬于兵

仍就故任統屬長沙太守韓玄

府志韓玄墓在督學署左側有韓公祠

於漢中定軍山擊夏侯淵

水經沔水注沔陽東山上有西樂城城側有谷謂之容襄谷容襄溪水注之水左有故城憑山卽嶮四面阻絕昔先主遣黃忠據之以拒曹公古今刀劍錄曰黃忠從先主定南郡得

一刀赤如血於漢中擊夏侯淵一日之中手刃數百

瓚遣先主爲田楷拒袁紹

爲字誤同先主簿應改爲與

注善雲來附

何云善字元板作喜

注先主就袁紹雲見於鄴

何云本傳先主爲平原相時雲已隨從主騎別傳謂就袁紹雲見於鄴則在建安十五年後此遠反不可信者也

注亮率雲與張飛等俱泝江西上平定郡縣至江州分遣雲從外水上江陽

方輿紀要卷六十九重慶府巴縣有江州城庾仲雍曰江州

縣對二水口右則涪內水左則蜀外水是外水卽岷江也對涪內水故曰外

注值曹公揚兵大山

山一本作出

亮出軍揚聲由斜谷道曹真遣大眾當之亮令雲與鄧芝往拒而身攻祁山雲芝兵弱敵彊失利於箕谷然斂眾固守不至大敗

水經沔水注曰漢水又東合褒水水西北出衙嶺山東南逕大石門歷故棧道下谷俗謂千梁無柱也諸葛亮與兄瑾書曰前趙子龍退軍燒壞赤岸以北閣道緣谷一百餘里其閣梁一頭入山腹其一頭立柱於水中今水大而急不得安柱

此其窮極不可彊也又云頃大水暴出赤岸以南橋閣悉壞時趙子龍與鄧伯苗一戍赤崖屯田一戍赤崖口但得綠崖與伯苗相聞而已方輿紀要卷五十五箕谷在寶雞縣東南四十里又卷五十六赤崖在漢中府城西北亦曰赤岸

七年卒

城冢記南陽縣南十五里爲蜀偏將軍趙雲墓有石碑一清案子龍卒於蜀無由葬於南陽疑記爲誤

雲子統嗣官至虎賁中郎督行領軍次子廣牙門將

姜云趙關張及武侯之後先後殉國一時君臣相得之雅奕世猶同休戚千載而下爲之慨慕不已

黃忠趙雲疆摯壯猛並作爪牙其灌滕之徒歟

李氏云灌推項羽於垓下滕脫孝惠於彭城比於定君當陽之事

宿松羅忠濟初校

番禺陶邵學覆校

陽湖吳翊寅再覆校

三國志注補卷三十七

仁和趙一清撰

蜀志列傳第七

龐統字士元襄陽人也少時樸鈍未有識者潁川司馬徽清雅有知人鑒統弱冠往見徽徽採桑於樹上坐統在樹下共語自晝至夜微甚異之稱統當爲南州士之冠冕由是漸顯

世說南郡龐士元聞司馬德操在潁川故二千里侯之至遇德操採桑士元從軍中謂曰吾聞丈夫處世當帶金佩紫焉有屈洪流之量而執絲婦之事德操曰子且下車子適知邪徑之速不慮失道之迷昔伯成耦耕不慕諸侯之榮原憲桑樞不易有官之宅何有坐則華屋行則肥馬侍女數十然後

爲奇此乃許父所以慷慨夷齊所以長歎雖有竊秦之爵千
駟之富不足貴也士元曰僕生出邊垂寡見大義若不一叩
洪鍾伐雷鼓則不識其音響也何云士上世說注有人字

注諸葛孔明爲臥龍龐士元爲鳳雛司馬德操爲水鏡皆龐德
公語也德公襄陽人孔明每至其家獨拜牀下德公初不令止
德操嘗造德公值其渡沔上祀先人墓

水經沔水注沔水中有魚梁洲龐德公所居士元居漢之陰
在南白沙世故謂是地爲白沙曲矣司馬德操宅洲之陽望
衡對宇惟情自接泛舟塞裳率爾休暢豈待還桂柁於千里
貢深心於永思哉後漢書逸民傳德公居峴山之南未嘗入
城府躬耕田里夫妻相敬如賓荊州刺史劉表數延請不能

屈乃就侯之遂攜其妻子登鹿門山因採藥不反宋書武二
王傳論曰襄陽龐公謂劉表曰若使周公與管蔡居茅屋之
下藜藿之羹豈有若斯之難夫天倫由子共氣分形寵愛之
分雖同富貴之情則異也追味尙長之言以爲太息尙長豈
龐公字乎世說注引司馬徽別傳曰徽字德操潁川陽翟人
有人倫鑒識居荊州知劉表性暗必害善人乃括囊不談議
時人有以人物問徽者初不辨其高下每輒言佳其婦諫曰
人質所疑君宜辨論而一皆言佳豈人所以咨君之意乎徽
曰如君所言亦復佳其婉約遜遁如此嘗有妄認徽豬者便
推與之後得其豬叩頭來還徽又厚辭謝之劉表子琮往候
徽遣問在不會徽自鋤園琮左右問司馬君在邪徽曰我是

也琮左右見其醜陋罵曰死傭將軍諸郎欲求見司馬君汝何等田奴而自稱是耶徽歸刈頭着幘出見琮左右曰見徽故是向老翁恐向琮道之琮起叩頭辭謝徽乃謂曰卿真不可然吾甚羞之此自鋤園唯卿知之耳有人臨蠶求簇箔者徽自棄其蠶而與之或曰凡人損己以贍人者謂彼急我緩也今彼此正等何爲與人徽曰人未嘗求己求之不與將慚何有以財物令人慚者人謂劉表曰司馬德操奇士也但未遇耳表後見之曰世間人爲妄語此直小書生耳其智而能愚皆此類荆州破爲曹操所得操欲大用會其病死

注故世人遂謂龐曰德公名非也德公字山民

公下脫子字劉表傳注引司馬彪戰略有龐季水經沔水注

宜城縣有太山此山以建安三年崩聲聞五六十里雉皆屋
雖縣人惡之以問侍中龐季云山崩水竭國土將亡之占也
十三年魏武平荊州沔南彫散龐季豈卽山民歟

注子渙字世文晉太康中爲牂柯太守

襄陽耆舊傳渙去官歸鄉里居荊州南白沙鄉里人宗敬之
曰語曰我家池中龍種來歸鄉里仰其德讓少壯皆代老者
擔

吳將周瑜助先主取荊州因領南郡太守

御覽卷二百六十四引荊州先德傳曰周瑜領南郡以龐士
元名重州里所信乃逼爲功曹任以大事瑜垂拱而已

注驚牛一日行三百里

三國志注卷三十七
何云元板百作十

注子昭誠自長幼貌潔然

何云幼字疑

先主領荊州統以從事守耒陽令

前漢書地理志桂陽郡耒陽

注今日不取終爲人利百備遂行

何云以皇極幽昧漢祚將墜較其輕重則取璋不爲非

注夫霸王者必体仁義以爲本

体乃體字之譌

注從理則羣策必舉

必一本作舉

久之爲新都令

方輿紀要卷六十七新都舊城在今成都府新都縣治東二里漢縣屬廣漢郡蜀漢嘗置新都郡

復令正銜命

方輿紀要卷七十八使君灘在夷陵州西一百十里大江中或曰益州牧劉璋遣法正迎主先於此

乘劉牧之懦

何云懦下宋本有弱字

顧念宿遇瞻望悵悵

悵一本作悵

又魚復與關頭實爲益州福禍之門

方輿紀要卷六十六瞿唐關在夔州府城東八里以瞿唐峽而名峽在城東三里或謂之西陵峽或謂之廣漢峽三峽之一也志云瞿唐關卽故江關巴楚相攻時置漢有江關都尉治魚復華陽國志江關舊在赤甲城後移在江南岸對白帝城或謂之捍關

坐守都雒

都雒謂成都雒縣也

注高義冠世

何云冠宋本作蓋

一滄之德匪毗之怨無不報復擅殺毀傷已者數人

何云所殺卽前所云州邑俱僑客者

注諸葛氏之言於是乎失政刑矣

何云艱難之初權以濟事未宜以常道論也又先主初定益州與晉君祖宗世守之國勢殊且諸葛公方以審配不容許攸爲鑒也

舉眾往討則必可克之克之日廣農積穀觀釁伺隙上可以傾覆寇敵尊獎王室中可以蠶食雍涼廣拓境土下可以固守要害爲持久之計

何云則必可克爲句下作克之之日孝直智術不下公瑾且猶知尊獎王室非碌碌程郭惟思攀附孟德者也

曹公西征聞正之策曰吾故知元德不辦有此必爲人所教也華陽國志操曰吾收奸雄略盡獨不得正耳

注將計略未展

何云將字元板作特

注非測實之常言也

何云常字宋本作當

注官至奉車都尉漢陽太守

此是遙領

法孝直若在則能制主上令不東行就復東行必不傾危矣

何云蓋指定軍之役

注先主與曹公爭勢有不便宜退而先主大怒不肯退無敢諫者矢下如兩正乃往當先主前先主云孝直避箭正曰明公親當矢石況小人乎先主乃曰孝直吾與汝俱去遂退

姜云此注當在必不傾危矣之下但不知所引何書

宿松羅忠濟初校

番禺陶邵學覆校

陽湖吳翊寅再覆校

三國志注補卷三十八

仁和趙一清撰

蜀志列傳第八

許靖字文休汝南平輿人少與從弟劭俱知名並有人倫臧否之稱而私情不協

典論汝南許邵與族兄靖俱避地江東保吳郡爭論於太守許貢前至於手足相加

其紀綱同類仁恕惻怛

何云怛宋本作隱

術兵前進

何云術兵卽孫策也

整勅元戎

何云勅宋本作飭

者弱並殺

者乃老字之譌

并及羣從自諸妻子一時略盡復相扶侍

何云自當作泊侍當作持並從冊府改

注許靖羈客會稽閭閻之士孫策之來於靖何爲而乃泛萬里之海入疫癘之鄉致使尊弱塗炭百罹備經可謂自貽矣謀臣若斯難以言智

何云袁術僭盜策爲其部曲文休避地未可厚非又文休雖曰羈客然名滿八區誠畏爲袁氏僞命所汙當時誰能預料

伯符絕術厥後兄弟相繼開吳鼎立哉卽于季玉非有君臣之分慕仰宗傑希欲歸命亦與臨難邀利殊科論者原其本末可也謀臣當作謀身

注又張子雲昔在京師志匡王室

何云此張津卽是袁紹使說何進誅宦官者故云志匡王室注有連蜀之意

蜀字何氏校改屬

注將欲歛之必固張之將欲取之必固與之其孟德之謂乎

何云斯時稍覺悟操之將篡非復歸死國家其意故應優於劉子初也

始靖兄事潁川陳紀與陳郡袁煥

袁煥卽袁曜卿本傳是煥字

注魏略王朗與文休書曰

此書諸葛公所謂迫於元禍而苟免者也

注今者親生男女凡有幾人年並幾何僕連失一男一女今有二男大男名肅

男字何氏校改兒

注又曰過聞受終於文祖之言於尙書又聞麻數在躬允執其中之文於論語

何云冊府過作愚姜云王景興漢室舊臣中原名士而豔稱禪受之事誇張富貴之樂與華子魚輩同一賊耳

注然後綬帶委質

何云冊府作緩帶

注又曰前夏有書而未達今重有書而并致前問

何云靖亡於章武二年則此書不及見矣

注既承認直

直字何氏校改旨

麋竺字子仲東海朐人也

後漢書郡國志東海郡朐寰宇記卷二十二牛欄村在郁州
島上後漢書郡國志云麋竺放牧之所今民祭祀猶呼云麋
堆山海經曰都洲在海中都音郁水經注曰朐縣東北海中
有大洲謂之郁洲昔有道者學徒十人遊於鬱州蒼梧之上
四百年皆得至道其山自蒼梧徙至東海之上今猶有南方

草木生焉故崔珍遂初賦曰柳州者故蒼梧山也古老傳言此島上人皆先是麋家之隸今有牛欄村舊有麋家莊祀祭呼曰麋郎臨祭之日著犁鐮執耕鞭又言初取婦者必先見麋郎否則爲祟又曰胸縣麋竺冢後漢書郡國志云刻石爲人馬禽獸之狀名之爲鬼神市一清案竺死於蜀中安能返海州蓋記事者失實之辭或是竺先世之墳塋耳又拾遺記麋竺用陶朱計術日益億萬之利貴擬王家有寶庫千間竺性能振生卹死家內馬廄屋側有古冢中有伏尸夜間涕泣聲竺乃尋其泣聲之處忽見一婦人袒背而來訴云昔漢末妾爲赤眉所害扣棺見剝今袒在地羞書見人垂二百年今就將軍乞更深埋并弊衣以掩形骸竺許之卽命爲棺槨以

青布爲衣衫置於冢上設祭既畢歷一年行於路西忽見前婦人所著衣皆是青布語竺曰君財寶可支一世合遭火厄今以青蘆杖一枚長九尺報君棺槨衣服之惠竺挾杖而歸所住鄰中常見竺家有青氣如龍蛇之形或有人謂竺曰將非怪也竺乃疑此異問其家僮云時見青蘆杖自出門間疑其神不敢言也竺爲性多忌信厭術之事有言中忤卽加刑戮故家僮不敢言竺貨財如山不可筭計內以方諸盆鉗設大珠如卵散滿於庭謂之寶庭而外人不得窺數日忽青衣童子數十人來云糜竺家當有火厄萬不遺一賴君能卹斂枯骨天道不辜君德故來禳卻此火當使財物不盡自今以後亦宜防衛竺乃掘溝渠周繞其庫旬日火從庫內起燒其

珠玉十分之一皆是陽燧旱燥自能燒火盛之時見數十青衣童子來撲火有青氣如雲覆於火上卽滅童子又云多聚鶴鳥之類以禳火災鶴能聚水巢上也家人乃收鴛鴦數千頭養於池渠中以厭火竺歎曰人生財運有限不得盈溢懼爲身之患害時三國交鋒軍用萬倍乃輸其寶物車服以助先主黃金一億斤錦繡氈罽積如丘壘駿馬萬疋及蜀破後無復所有飲恨而終

後曹公表竺領嬴郡太守

嬴郡卽秦安州之故嬴城

益州旣平拜爲漢將軍班在軍師將軍之右竺雍容敦雅而幹翮非所長

何云御覽平作定幹作翰

如今見察

何云冊府今作令

但餘情區區

餘當作愚

注爲之碑銘

何云宋本之字作立

處空虛之名居不靈之龜

二語管輅亦云疑古語也

文翁倡其教相如爲之師漢家得士盛於其世仲舒之徒不達

封禪相如制其禮

何云相如封禪書臨歿乃成未與諸儒共定其禮蜀士多誇
往往過實

注臣松之案書傳魯定公無善可稱宓謂之賢者淺學所未達
也

何云湯事未詳一清案定公能用孔子故稱之爲賢者
注僕文不能盡言

何云宋本作僕聞書不能盡言

纂將功曹古朴主簿王普廚膳卽宓第宴談宓臥如故

寰宇記卷七十三漢州德陽縣有秦宓宅李膺記云三造亭
秦子敕之舊宅也太守夏侯纂三造門故爲名其宅綿水衝
毀僅有餘迹

宓以簿擊頰

簿手版也

春秋左氏傳疏引徐廣車服儀制曰古者貴賤皆執笏今手版也然則笏與簿手版之異名耳蜀志稱秦宓見太守以簿擊頰則漢魏以來皆執手版

注禹本汶山廣柔縣人也生于石紐其地名劄兒坪見世帝紀方輿紀要卷六十七廣柔縣在茂州汶川縣西七十二里漢縣屬蜀郡有石紐村又七十三卷石紐山在龍安府石泉縣治南一里

天帝布治房心決政參伐參伐則益州分野

何云前漢書地理志蜀系秦分統於鬼輿東井參伐乃魏地星也此云參伐則益州分野未詳

又論皇帝王霸養龍之說

何云養當爲養

宿松羅忠濟初校

番禺陶邵學覆校

陽湖吳胡寅再覆校

三國志注補卷三十八

三國志注補卷三十九

仁和趙一清撰

蜀志列傳第九

董和字幼宰南郡枝江人也

方輿紀要卷七十八枝江縣漢置屬南郡以蜀江至此分枝
爲諸州而名

劉璋以爲牛鞞

音鞞江原長

方輿紀要卷六十七牛鞞廢縣今成都簡州治漢置屬犍爲
郡州南有赤水亦謂之牛鞞水

注偉度者

此注脫書名

注且以報表

且一本作具

注備雄人也

何氏改作人雄

注巴目大丈夫處世

目乃曰字之譌

注備固之

固乃問字之譌

注備又曰子初才智絕人如孤可任用之非孤者難獨任也亮亦曰運籌策於幃幄之中吾不如子初遠矣

何云子初粗有筆耳此助而張之造作劉葛之語也

注士眾皆捨干戈赴諸藏競取寶物軍用不足備甚憂之巴口
易耳但當鑄直百錢平諸物賈令吏爲官市

洪遵泉志蜀直百錢建安十九年劉備鑄舊譜云徑七分重
四銖又直五百銖錢徑一寸一分重八銖文曰五銖直百又
有傳形五銖錢顧烜曰傳形五銖今所謂蜀錢時有勒爲直
百者亦有勒爲五銖者大小稱量如一三吳諸屬縣行之何
云必無此事錢至直百豈復可通行初得一州公私囂然是
五均之續也以張益德傳中頒賜之差觀之則聽其赴藏競
取亦不然矣

及東征吳遣良入武陵

方輿紀要卷七十七七十九荆門州內方山東北有馬良口

又鄖陽府房縣東南二百里有馬良口堡保康縣南百里有馬良坪堡蓋地因良得名也

咸如意旨

旨一本作指

亮猶不然

何云猶下元板有謂字

謾下獄物故

同時敗者尙有高祥又謾之受誅亦以軍敗而逃耳見向朗傳

注亮受議而不獲奉承

議一本作誠

注則違明主之議

議一本作誠

注裁之失中卽殺有益之人難乎其可與言智者也

何云魏延吳壹輩皆蜀之宿將亮不用爲先鋒而違眾用謬其心已不樂矣今謾敗而不誅則此輩必益嘵嘵而後來者將有以藉口豈不惜一人而亂大事乎凡亮之治蜀所以能令人無異議者徒以其守法嚴而用情公也習氏之論亦不達於當時之勢矣

蜀旣定爲蜀郡北部都尉因易郡名爲汶山太守轉在犍爲

前漢書地理志蜀郡汶江後漢書郡國志作汶江道注引華陽國志孝安延光三年復立之方輿紀要卷六十七漢武置

汝山郡宣帝時廢靈帝以汝江靈陵廣柔三縣立汝山郡晉
太康地志云蜀漢時復置

先主立太子允以選爲舍人徙洗馬

前漢書百官公卿表太子太傅少傅屬官有先馬舍人後漢
書百官志舍人二百石更直宿衛如三署郎中洗馬比六百
石職如謁者太子出則當直者在
前導威儀

以允秉心公亮欲任以宮省之事上疏曰

何云此疏已載孔明本傳則休昭及向寵傳中可勿重出
攸之性素和順備員而已

廖立傳立曰中郎郭演長從人者耳不足與經大事而作侍
中演豈攸之之名乎

注臣松之以爲陳羣子泰陸遜子抗傳皆以子繫父不別載姓
及王肅杜恕張承顧劭之流莫不皆然惟董允獨否未詳其意
當以允名位優重事跡踰父故邪

何云允事關蜀存亡故與和傳別出

又遷新都綿竹令

後漢書郡國志廣漢郡新都方輿紀要卷六十七蜀漢嘗置
新都郡蜀有三都謂新都成都廣都也

累遷廣漢蜀郡太守

方輿紀要卷七十一廣漢廢縣在潼川州射洪縣東南百里
漢縣屬廣漢郡三國漢嘗析置東廣漢郡於此廢却縣今潼
川州治漢縣屬廣漢郡胡氏曰劉禪嘗於此置東廣漢郡一

清案楊戲輔臣贊注習禛爲南廣漢太守或卽廣廣漢乎

宿松羅忠濟初校

番禺陶邵學覆校

陽湖吳翊寅再覆校